

# Ette äänestää

Pyhänä 11 syyskuuta 2022 oon vaalit valtiopäivile, kunnan- ja rekiuunivaltuusthoon.

## Kukas saapii äänestää?

Ette olla äänestysoukeutettu sie piät olla täyttäny 18 vuotta viimisthäns vaalipäivänä. Tiot kansankirjarekisterissä 30 päivää ennen vaalipäivää päättävät jos sulla oon äänestysoukeus ja mihinkä vaalistrikhthiin sie kuulut.

**Sulla oon äänestysoukeus valtiopäivile jos sie olet:**

- ruottalainen kansalainen ja olet elikkä olet ollu kansankirjoila Ruottissa.

**Sulla oon äänestysoukeus kunnan- ja rekiuunivaltuusthoon jos sie olet:**

- ruottalainen kansalainen ja kansankirjoila Ruottissa
- kansalainen jossaki Eurooppayniuunin jäsenmaassa elikkä kansalainen Islantissa elikkä Norjassa ja olet kansankirjoila Ruottissa.
- kansalainen jossaki muussa maassa ja olet ollu kansankirjoila Ruottissa kolme vuotta peräkkää ennen vaalipäivää.

## Sie joka olet äänestysoukeutettu saat äänestyskortin

Sie, joka olet äänestysoukeutettu, saat äänestyskortin postin kautta suunile kolme viikkoa ennen vaalia. Äänestyskortissa seisoo mihinkä vaahliin sulla oon äänestysoukeus ja nimi, osote ja aukioloaijat sinun vaalipaikale. Jos sie kaipaap sinun äänestyskorttia sie saatat tilata uuen kunnalta elikkä Vaalivirastolta.

## Vaaliseeteliä

Vaaliseetelit oon keltaset valtiopäivävaahliin, valkeat kunnanvaltuustovaahliin ja siniset rekiuunivaltuustovaahliin. Vaaliseeteliä oon kaikissa paikoissa jossako sie saatat äänestää.

## Äänestä parttiota

Sie äänestät ennen kaikkia yhtä parttiota. Parttion nimi seisoo vaaliseetelissä. Jos sie et löyä sinun parttion vaaliseeteliä sie saatat kirjottaa parttion nimen tyihhään vaaliseeteliin.

## Henkilöäänestä

Jos sie halvaat ette joku erikoinen parttion kantitaatista tulis valikoituksi, sie saatat panna kryssän ruuthuun kantitaatin nimen etheen nimivaaliseetelissä. Sie saatat kryssätä vain yhen kantitaatin. Sie saatat kansa henkilöäänestä kirjottamalla parttion nimen ja kantitaatin nimen tyihhään vaaliseeteliin.

## Täälä sie saatat äänestää

### Äänestä sinun vaalipaikala vaalipäivänä 11 syyskuuta

Sie saatat äänestää vain siinä vaalipaikassa joka seisoo sinun äänestyskortissa. Vaalipaikka oon vain auki vaalipäivänä. Ko sie äänestät sinun vaalipaikassa niin sinua merkathaan äänestysluettelussa ja sinun äänet panthaan vaaliyrhnoin.



